

## Þjónustusamningur

Mennta- og menningarmálaráðuneyti annars vegar og Fræðslumiðstöð atvinnulífsins ehf. (FA) hins vegar gera með sér þjónustusamning þennan á grundvelli 15. gr. laga nr. 27/2010 um framhaldsfræðslu og 30. gr. laga nr. 88/1997 um fjárreiður ríkissjóðs.

### 1. gr. Verkefni

Fræðslumiðstöð atvinnulífsins ehf. (FA), sem starfar skv. samþykktum, dags. 6. maí 2010, tekur að sér að annast eftirfarandi verkefni skv. samningi þessum:

1. Semja námskrár og námslýsingar og vinna með öðrum að þróun þeirra. sbr. 6. gr. laga nr. 27/2010 um framhaldsfræðslu. Samráð skal haft við mennta- og menningarmálaráðuneyti sem vottar námskrárnar.
2. Annast umsýslu með Fræðslusjóði og fjárreiðum hans, sbr. 10. gr. laga nr. 27/2010 um framhaldsfræðslu. Fara skal með fjármál sjóðsins í samræmi við lög nr. 88/1997 um fjárreiður ríkisins og reglugerðir sem settar eru á grundvelli þeirra laga.
3. Safna, varðveita og miðla upplýsingum í samstarfi við mennta- og menningarmálaráðuneyti og Hagstofu, sbr. 13. gr. laga nr. 27/2010 um framhaldsfræðslu.
4. Afla upplýsinga um markhópin, sbr. a) – e) liði 2. gr. og a) lið 3. gr. laga nr. 27/2010 um framhaldsfræðslu, og menntunarþarfir hans.
5. Skilgreina menntunarþarfir hópsins í samstarfi við atvinnulíf og fræðsluaðila og byggja upp framboð á lengra og styttra námi til að mæta þeim þörfum.
6. Þróa aðferðir í framhaldsfræðslu í samvinnu við fræðsluaðila og miðla innlendum sem erlendum nýjungum til fagfólks.
7. Tryggja þróun og útbreiðslu raunfærnimats og fylgjast með framkvæmd þess, og veita starfandi fagfólki þjálfun og endurgjöf.
8. Hafa umsjón með þróun náms- og starfsráðgjafar fyrir markhópin, sbr. 4. tölulið þessarar greinar, í samstarfi við fræðsluaðila og sérfræðinga hér á landi sem og erlendis og miðla þekkingu á því sviði til fagfólks.

KG JG  
M GG

9. Efla gæði fræðslustarfs og ráðgjafar hjá viðurkenndum fræðsluaðilum með þróun gæðaviðmiða í samráði við ráðuneytið.
10. Þróa og viðhalda nemendabókhaldi í samstarfi við fræðsluaðila og mennta- og menningarmálaráðuneyti þar sem taka skal mið af mati á óformlegu námi og raunfærni, sbr. 2. og 3. mgr. 13. gr. laga nr. 27/2010 um framhaldsfræðslu.
11. Miðla upplýsingum um það starf sem fer fram á vettvangi framhaldsfræðslu, bæði hér á landi og erlendis, í þeim tilgangi að auka þekkingu og efla skilning á málaflokknum.
12. Stuðla að aukinni námsefnisgerð fyrir framhaldsfræðslu og gefa höfundum og útgefendum á því sviði fagleg ráð.
13. Undirbúa aðkomu nýrra hópa að framhaldsfræðslu og nýta samlegðaráhrif í starfi FA.
14. Annast önnur verkefni á vettvangi framhaldsfræðslu sem mennta- og menningarmálaráðuneyti kann að fela FA.

## **2. gr.** **Umfang og áherslur**


Fjárveitingar til verkefna samkvæmt samningi þessum eru ákveðnar í fjárlögum hvers árs, sbr. 9. gr. laga um framhaldsfræðslu. Mennta- og menningarmálaráðuneyti annast öll samskipti aðila vegna samningsins við fjármálaráðuneyti og Alþingi. FA kynnir ráðuneytinu hugmyndir sínar um fjárveitingar til samningsins á komandi fjárlagaári eigi síðar en í febrúar árið á undan. Ráðuneytið miðar við að kynna fyrir FA fjárlagatillögur sínar vegna samningsins í október ár hvert. Á fjárlögum 2011 er áætlað að framlög til FA vegna samnings þessa nemi 111,4 m.kr.

FA skal fyrir 15. nóvember ár hvert leggja drög að starfs- og rekstraráætlun sinni fyrir næsta almanaksár fyrir mennta- og menningarmálaráðuneyti til afgreiðslu, nema ráðuneytið ákveði annan skiladag. Í henni skal fjalla um áherslur og afmarka umfang verkefna nánar.

Verði fjárveiting til samningsins í fjárlögum önnur en samkvæmt tillögu ráðuneytisins skal FA leggja fram endurskoðaða áætlun fyrir lok janúar á fjárlagaárinu.

## **3. gr.** **Samskipti og eftirlit**

Mennta- og menningarmálaráðuneyti annast eftirlit vegna þessa þjónustusamnings. Fulltrúar mennta- og menningarmálaráðuneytis hafa heimild til að fylgjast með og gera úttektir á allri framkvæmd og starfsemi FA. Í því sambandi hafa þeir aðgang að öllum

 2  
W  
GE

gögnum hjá FA sem máli skipta, þar á meðal fylgiskjölum, skýrslum, bókum og bréfum. Þjónustusamningurinn og umsamin verkefni eru háð eftirliti Ríkisendurskoðunar í samræmi við lög nr. 86/1997

Haldnir skulu reglulegir samráðsfundir aðila tvisvar á ári sem mennta- og menningarmálaráðuneyti boðar til þar sem farið er kerfisbundið yfir starfsemi og áætlanir FA.

FA skal fyrir 30. apríl ár hvert senda mennta- og menningarmálaráðuneyti ársskýrslu þar sem grein er gerð fyrir framgangi verkefna sem FA hefur unnið samkvæmt samningi þessum, svo og framgangi annarra verkefna fyrir tilmæli mennta- og menningarmálaráðuneytis. Jafnframt skal fylgja ársreikningur fyrra árs, áritaður af löggiltum endurskoðanda.

Mennta- og menningarmálaráðuneyti mun, að höfðu samráði við FA, láta gera heildarúttekt á starfsemi miðstöðvarinnar fyrir árslok 2013.

#### 4. gr.

#### Fjárhagsleg atriði

FA er heimilt að taka að sér verkefni á sviði framhaldsfræðslu á kostnað aðila í atvinnulífinu, enda bitni verkefnin ekki á framkvæmd þessa samnings. FA skal í fjárhagsbókhalði sínu halda gjöldum og tekjum vegna slíkra verkefna aðgreindum frá rekstri verkefna samkvæmt samningi þessum.

Árlegt framlag samkvæmt samningi þessum greiðist mánaðarlega með jöfnum greiðslum inn á bankareikning FA.

#### 5. gr.

#### Ábyrgð FA

FA ber fulla ábyrgð á framkvæmd verkefna skv. þjónustusamningi þessum en er þó heimilt að kaupa þjónustu verktaka vegna einstakra verkefna. FA ber þó alla ábyrgð á verkefnunum og skal ekki gera minni kröfur til undirverktaka en gerðar eru til FA skv. samningi þessum.

FA er óheimilt að efna til fjárhagslegra skuldbindinga sem geta haft áhrif á möguleika FA til að efna samninginn, svo sem að taka önnur lán en eru nauðsynleg vegna daglegs reksturs, framselja samninginn til annarra eða veðsetja hann.

FA er óheimilt að ráðstafa fjárveitingum til samningsins í annað en það sem ráðuneytið fellst á samkvæmt áætlun í 2. gr.

JK 3 HG  
M GE

**6. gr.**  
**Meðferð ágreinings**

Samningsaðilar munu leitast við að jafna ágreining, ef einhver er, sín á milli. Dómsmál sem rísa kann út af samningi þessum skal rekið fyrir Héraðsdómi Reykjavíkur.

**7. gr.**

Þjónustusamningur þessi gildir frá 1. janúar 2011 til ársloka 2015.

Samningsaðilar, annar eða báðir, geta óskað eftir endurskoðun eða uppsögn samningsins áður en samningstímabil hans er útrunnið, enda hafi risið ágreiningur um framkvæmd samningsins milli aðila vegna meintra vanefnda eða brota á honum og ekki tekist að leysa hann, sbr. ákvæði 6. gr. Samningaviðræður skulu hefjast í síðasta lagi einum mánuði eftir að óskin hefur formlega verið sett fram.


Uppsögn skal tilkynna formlega með níu mánaða fyrirvara.


Samningsaðilar tilkynna hvor öðrum hálfu ári áður en samningurinn rennur út hvort þeir óski eftir áframhaldandi samningssambandi um verkefni samningsins eða önnur verkefni á sviði framhaldsfræðslulaga.


Af samningi þessum eru gerð tvö samhljóða frumrit og heldur hvor aðili sínu.

Reykjavík, 24. nóvember 2010

  
Katrín Jakobsdóttir,  
mennta- og menningarmálaráðherra

  
Halldór Grönvold, formaður stjórnar  
Fræðslumiðstöðvar atvinnulífsins

  
Guðrún Eyjólfsdóttir, varaformaður  
stjórnar Fræðslumiðstöðvar atvinnulífsins

  
Ingibjörg E. Guðmundsdóttir, framkv. stj.  
Fræðslumiðstöðvar atvinnulífsins